

CARTA JEE NI TEE SAN PABLO APOSTOL NUU ÑAYUU GALACIA

¹ Máá rí cúu Pablo apóstol. Te nasuu ñayuu ni jéni ruhū ni nasuu ñayuu ni tájí rúhū jeē nácani ri jnūhun, chi sa suhva máá Jesucristo jiín Tátá yō Yaā Dios, Yaā ní nastécu Jesús mēhñu ndíyi. ² Te ruhū jiín táca hermano cáyūcu jiín rí yāhá, cátee ri carta yáha cuájeē nuū rohó ñayuu cáandíje níí regióon Galacia. ³ Te cáñuhun ni rí jeē Tatá yō Yaā Dios jiín Jítaho yō Jesucristo, na saha ga yā jeē váha róhó, te saha ya jeē coo ndeyí coo sīi ni rō. ⁴ Chi Jesús ni socō yā maá yá jeē ni jíhī yā jeē siquí cuéchi yó, návāha jnama ya yohó nūū tāca jéē neé íyó ñayívi yáha, chi súcuan ni nujnahan ni maá Tátá yō Yaā Dios. ⁵ Jeē yúcuan na cahán yō jeē yóhyo luu cújéhnu ya níí cání. Súcuan na cóo. Amén.

Siquí jeē tuá na inga jnūhun cācu ñayuu

⁶ Te náhán náá ni rí jíto ri jeē yóhyo yachí cánducú ró stóo ró Yaā Dios, Yaā ní cana róhó jéē quívi ró ndaha ya siquí jeē cundáhú ni Cristo yohó. Chi ni candiquín ró inga jnūhun jeē sīn cahán. ⁷ Te tú cuití na inga jnūhun jnama yohó íyó. Te cahíyo jecu ñayuu castáhán i róhó, te cáguni i nasama i jnūhun ndese jnáma Cristo yohó. ⁸ Te nūu iin ñayuu nacani inga jnūhun nuū rō ndese jnáma ya rohó, te nūu tu quíjnáhan jíín jnúhun ni canacani ri nuū rō xihna gā, na jnáhnú ndetū ñayuu ún. Te vēsú maá rí chí iin ndajéhé jeē quíji nde andíví nacani inga jnūhun

núú, na jnáhnú ndetū. ⁹ Je ni cahān rī jiín ró, te suni súcuán cáhán tucu ri vijna: Na-ni tēe nacani īnga jnūhun nuū rō, te núu tu quíjnáhan jiín jnúhun jeēní cajetáhú ró, na jnáhnú ndetū tēe ún.

¹⁰ Te jeē cahán rī súcuán, ¿á ndúcú rí jeē cuajnúhún ñayuu ruhū, chí Yaā Dios? ¿Chí ndúcú rí jeēcúsíí ni ñayuu jiín rí, cájeni ni rō? Núu ndúcú gá rījeē cúsíí ni ñayuu jiín rí, te nasūu mozo Cristo cúu ri núu súcuán.

Ndese ni jinū Pablo cíu de apóstol

¹¹ Te cástuhun rí nuū rō, hermano jijnáhan ró, jéē jnúhun jnáma ya yohó jéē nácani ri, nasūu jéēníjeni ni maá rí jiín ñayuu cíu. ¹² Chi nasūu ñayuu ni stéén nuū rī, ni nasūu ñayuu ni saha jeēní cutuhva ri, chi sa suhva máá Jesucristo ni steén nuū rī.

¹³ Chi je ni cajini jnūhun ró ndese ni saha ri nde saá, ná ni chiñúhún rí sahān jnáhan ri ñayuu hebreo. Te cájini rō jeē yóhyo ni jito xeēn rī ñayuu cáandíje nuū Yaā Dios, te ni condihvī ni rī snáā rī i núú. ¹⁴ Te vāha ga ni cutuhva ri sahān ún vēsú cuehē gā tēe nación rī jeēní cajechnu jiín rī, chi ni condihvī gā ni rī siquī tāca jeēní cajequin jií rī. ¹⁵ Te vēsú súcuán te Yaā Dios je ni nacāji ya ruhū nde ná tu cacu ri, te iin quívī te ni cusíí ni yā ni cana ya ruhū jeē quívī ri ndaha ya, siquī jeē yóhyo ni cundáhú ni yā ruhū. ¹⁶ Te ni steén yā Sēhe ya nuū rī, návāha nacani ri jnūhun ndese jnáma ya ñayuu tācā nación jeē tu jíní jnūhun ya. Yūcuán na te tu ní cájnūhun rī ni iin ñayuu, ¹⁷ ni tu ní jehén rī nūu Jerusalén nuū tée cácuu apóstol xīhna gā vēsú ruhū. Chi sa suhva ni jehēn-ni rī nde región Arabia, te saá te ni nuhūn tucu ri ñuu Damasco.

18 Yūcuán na te nde ni yāha unī cuiyā, te ni jehēn rī Jerusalén. Te ni jini jnáhan ri jiín Pedro, te ni condee rī jiín de xahūn-ni quívī. **19** Te tu ní jíto ri nuū tāca gá apóstol, chi máá iin-ni nuū Jacobo ñani maá Jítoho yō. **20** Jnūhun yáha jéē tée ri cuajeē nuū rō, chi jíní Yaā Dios jeē ndaā cíu.

21 Yūcuán na te ni jehēn rī nií regióñ Siria jiín Cilicia. **22** Te ñayuu cágandíje jeē yíhi ndaha Cristo, jeē cágucú regióñ Judea, ná tu coto cuítí i nuū rī saá. **23** Chi máni jnūhun-ni ni cajini i cácahān ñayuu: Tée ni jito xeēn yohó ndé saá, vijna chi nácani de jnūhun cándíje yó jéē ní nducú de snáā de nde saá, áchí i. **24** Te ni cacahān i jeē yóhyo cújéhnu Yaā Dios jeē súcuan ni sáha ya jiín rí.

Jeē ní cajetáhú táca gá apóstol un Pablo

2

1 Yūcuán na te nde nuū uxí cuún cuiyā, te ni jehēn tucu ri Jerusalén jiín Bernabé, te suni ni jeca ri Tito ni jehēn de jiín rí. **2** Te ni jehēn rī chi máá Yaā Dios ni steén yā jeē jíni ñíuhún quíhín rī. Te ni candutútú sín nene tée cágújhnu nuū ñayuu cágandíje ún. Te ni castúhun rí nuū de siquí jnúhun jnáma ya yohó jéē nácani ri nuū ñayuu tāca nación tu jíní jnúhun ya. Te súcuan ni sáha ri návāha cuajnúhún de jniñu ri, te ma quéndōo cāhá jniñu sáha ri jiín jéē ni sáha ri. **3** Te ni tu ní cásáha fuerza de Tito, tée ni jica jiín rí, jeē cóndee jnunī circuncidar de, vēsú nasūu téé hebreo cíu de. **4** Te súcuan ni cundaā, vēsú ni quívicoo jecu tée stáhú jéē sáha de jeē hermano cácuu de. Te tée un ní quívicoo de návāha yuhu-ni coto de ndese ni ndulibre yō nuū ley circuncidar

siquī jeē yíhi yó ndaha Cristo Jesú. Chi cágundi de jeē squícu tucu yó ley un, nduu tucu yó mozo nuū ley un. ⁵ Te tu ní cájetáhú cuití rī nuū téé ún, chi cúní rī jeē quéndoo nílhin ró jíjnáhan ró jíín jnúhun jnáma ya yohó.

⁶ Te máá téé cágujéhnu nuū ñáyuu cágandíje ún, tuá na inga jniñu jéé ní cándacu de nuū rī. Te máá rí chi tu ní chíhi ri cuenta siquī jeē cágujéhnu de, chi suni Yaā Dios tu sáha ya cuenta, chi inuú-ni cíuú ndívii téé nuū yā. ⁷ Chi sa suhva ni cajini de jeē jnúhun jnáma ya yohó, ndíso jniñu ri nacani ri nuū ñáyuu tācá nación jeē tu cásáha circuncidar, nájnūhun nácani Pedro jnūhun un núū ñáyuu hebreo jeē casáha circuncidar. ⁸ Chi Yaā Dios jeē ní tají Pedro jeē nácani de jnūhun nuū ñáyuu hebreo, suni máá yá ni tají rúhū jeē nácani ri jnūhun nuū ñáyuu tācá nación tu jíní jnūhun ya.

⁹ Jeē yúcuan, Jacobo jíín Pedro jíín Juan, ni cajini de jeē Yaā Dios ni jéhe ya jniñu luu yáha nuū rī. Te téé un cágahān ñayuu cágandíje jeē maá de cágujéhnu ga. Te ni cajnií de ndaha ri jíín ndaha Bernabé, jeē ní castéén de jeē cágijo maní de jíín rí, jíín jéé ní cacundaā ni de jeē maá rí quingōo nacani jnūhun nuū ñáyuu tācá gá nación, te máá de jíjnáhan de nuū ñáyuu hebreo. ¹⁰ Te máá iin-ni jeē ní cajicān de cíuú jeē cónahán rí chindéé ñáhán rí ñayuu cándoho ndáhú, te jniñu ún je ni condihvī ni rī ni sáha ri.

Jeē ni cágahān Pablo nuū Pedro

¹¹ Te ná ni quiji Pedro ñuu Antioquia, te ni cágahān cají rí nuū de, chi ni stíví de jniñu. ¹² Chi nde ná tu quecoo sava jnáhan de hebreo jeē ní tají Jacobo, te yéji de staā jíín ñáyuu jeē násúú hebreo cáguu.

Yūcuán na te nuūní quecoo tēe ún, te ni cusſín de jeē tuá yéji de jíin i, chi yúhú de jeē cúnī tāca tée un jéē tuá squícu de ley jnáhan de hebreo. Chi áchí ley jeē ma cúsí caji de staā jiín ñayuu jeē tu cásáha circuncidar. ¹³ Te sava ga tēe hebreo jeē cágandíje, suni ni cacujiyo de nuū i, nájnūhun ni sáha Pedro, chi cayūhú de jeē cúnī tēe ún. Te nde máá Bernabé ni cascáhán de ni cujiyo. ¹⁴ Yūcuán na te ni jini rī jeē ní canayūhú de caji de staā jiín ñayuu ún, cúsí jeē tuá jíca de jíin modo jeē cahán jnūhun jnáma ya yohó. Te ni cahán rī nuū Pedro, jíto jínūū tāca de: Róhó jéē cúsí tēe nación yō hebreo, tuá squícu ró ley jnáhan yō hebreo, chi yéji rō jiín ñayuu ún. ¿Te najehē safuerza rō i jeē squícu i ley jnáhan yo hebreo núu súcuan? ni achi rī.

In-ni modo jnáma ya ñayuu hebreo jiín tāca gá nación

¹⁵ Te yóhó chi cúsí yō ñayuu hebreo, te cácahán yō jeē násūu ñayuu tāca gá nación casáha cuēchi cacus yó. ¹⁶ Te vēsú súcuan te jíní yō jeē ní iin yó tu quéndōo ndaā yō nuū Yaā Dios jeē squícu yō jniñu ndácu ley Moisés jenahán, chi máá jéē candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návāha ndahva yā cuēchi yó síquí jeē candíje yó, nasūu jíin jéē nducú yó squícu yó ley un. Chi áchí tutu iī: Ni iin ñayuu ma quéndōo ndaā i nuū Yaā Dios jiín jéē nducú i squícu i jniñu jeē ndácu ley, achí.

¹⁷ Te máá yó ñayuu hebreo, núu cúní yō jeē ndahva Yaā Dios cuēchi yó síquí jeē ni jíhī Cristo jehē yō, suu cúsí jeē jécuhun ni yō jeē suni ñayuu casáha cuēchi cúsí yó, nájnūhun tāca gá ñayuu. Núu

súcuán ¿te á cuéchi ni sáha yó jeē ni stóo yó ley jenahán ná ni candíje yó Cristo? Tú cuítí jeē súcuán. ¹⁸ Chi sa núu naquihin tucu yó ley jeē ni stóo yó un, te súcuán tée yó cuéchi síquí maá yó. ¹⁹ Chi ruhū, nájnūhun ni jihī rī ni sáha ley un, te jeē yúcuán má cíu ga ndacu jniñu nuū rī. Te súcuán te cuu cotecu rī jeē sáha ri jeē cuní Yaā Dios. ²⁰ Chi nájnūhun je ni jihī rī jicā cruz jiín Cristo, te vijna chi tuá técu rī jeē maá rí, chi máá Cristo cíu jeē técu ini rī. Te jeē técu rī ini ñayíví yáha vijna cíu jeē candíje ri jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socō yā maá yá jehē rī. ²¹ Núu súcuán te tu cúní rī casí rī nuū jnūhun jeē ndáhva Yaā Dios cuéchi yó síquí jeē yóhyo vāha ni yā jiín yó. Chi núu jeē quéndoo ndaā yō nuū yā jeē nducú yó squícu yó ley jenahán, yūcuán na te tu ndé jéjníñu jeē ni jíhī Cristo nuú.

Jnūhun ley jiín jnúhun cándíje

3

¹ Róhó hermano ñuu Galacia, ¿naun tu cájecūhun ni rō? ¿Ndé tée ni saca núu xinī rō jeē tuá cájetáhú ró jnūhun ndaā? Chi ná ni canacani ri jnūhun ya nuū rō, te cájí ndasí ni cajecūhun ni rō jeē ni jíhī Jesucristo jicā cruz jehē rō. ² Hin-ni jnūhun yáha cájnūhun rí rohó: ¿Ndese ni canihīn rō Espíritu Santo? ¿A jeē ní cacundeyí ró squícu ró jniñu ndácu ley Moisés? Tú cuítí, chi jeē ní cacandíje ró jnúhun jnáma ya rohó jeē ní cajini sōho ró. ³ ¿Ndese cíu jeē tu cájecūhun cuítí ni rō? Chi xihna gā ni cacandíje ró jeē ni jíhī Cristo jeē jnama ya rohó, te ni canihīn rō Espíritu. Te vijna ¿á cájeni ni rō jeē stóo ró jnúhun

ún te fuerza maá ró squícu ró ley un, te cācu ró naún? ⁴ Núu súcuan te tu ndé ní jéjníñu cuítí jeē ní castóho ñayuu rohó síquí jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē váha te núu jeē tu ní castóo ró, chi sa cágandíje ndije ró yá. ⁵ ¿Te na síquí cíu jeē jéhe Yaā Dios Espíritu yā nuū rō te saha ya jniñu jéhnu mēhñu ró? Tu saha ya síquí jeē cánducú ró squícu ró ley un, chi síquí jeē ní cacandíje ró jnúhun jnáma ya rohó jéē ní cajini sôho ró.

⁶ Abraham ni candíje de jeē saha Yaā Dios jeē ni jéjnūhun ya, te jeē yúcuan ní ndahva yā cuéchi de. ⁷ Núu súcuan te na jécuhun ni rō jijnáhan ró jéē ñayuu cágandíje jeē saha Yaā Dios jehē i, ndívi i yucūn Abraham síquí jeē súcuan cágandíje i. ⁸ Chi nde jenahán je cáhán tutu iī jeē ñayuu tāca nación tu jíní jnūhun Yaā Dios, ndahva yā cuéchi i núu candíje i ún. Te nde ná tu cuu tāca jéē yáha te je ni jejnūhun ya jnūhun vāha yáha nuū Abraham: Jeē rohó cíu jeē quendōo ndetū ñayuu tāca nación. ⁹ Núu súcuan te ñayuu cágandíje, quéndōo ndetū i jíín Abraham, tēe ni candíje jeē ni jéjnūhun ya.

¹⁰ Te sa jnahnū ndetū ñayuu jeē cánducú i quendōo ndaā i jeē jíín ley Moisés. Chi súcuan yósó nūu tútu iī: Jnahnū ndetū tāca ñayuu jeē tu squícu ndihí cuítí jnūhun yósó nūu tútu ley, achí. ¹¹ Núu súcuan te cájí cíu jeē ni iin ñayuu ma quéndōo ndaā i nūu Yaā Dios síquí jeē nducú i squícu i ley un. Chi cáhán tutu: Ñayuu jeē ní ndahva yā cuéchi i, técu i jeē candíje i jeē saha ya jehē i, áchí. ¹² Te ley Moisés tu cáhán jeē cótecu yō ní cáni síquí jeē candíje yó, chi sa suhva cáhán: Núu ndé ñayuu squícu jniñu

yáha, te cotecu i sáha, áchí.

13 Te Cristo ni jnama ya yohó nūn jnúhun cáhán ley jeē jnahnu ndetū yō sīquī cuéchi yó, chi máá yá ni ndoho sīquī jnúhun jeē jnahnu ndetū yō. Chi yósó nūn tutu iī: Tāca ñáyuu condita caa jicā yújnu, jnahnu ndetū i, áchí. **14** Te Cristo Jesús ni jihī yā jicā yújnu cruz návāha quendōo ndetū ñayuu tācā nación sáha ya. Chi jnūhun jeē ni jéjnūhun ya quendōo ndetū Abraham, jinū nuū i. Te súcuan te nūu candíje yó jeē ni sáha Yaā Dios jehē yō, te nihīn yō Espíritu jeē ni jéjnūhun ya quiiji.

Sīquī ley jiín sīquī contrato jeē ni jéjnūhun ya

15 Hermano, na cáhán rī iīn jnūhun ndese cásáha ñayuu ñayīvī: Nūn iīn tēe sáha de iīn contrato chí iīn acta, te nūu je ni cucutú ni sáha de firmar, te ma cūu ga najnanū, ni ma cūu jecosō gā. **16** Te suni súcuan ni sáha Yaā Dios iīn contrato jeē ni jéjnūhun ya nuū Abraham jiín yúcūn de jeē quiiji. Te tu cáhán tutu iī sīquī cuehē yucūn de, chi sa cáhán sīquī iīn-ni yucūn de, te suu cūu Cristo. **17** Nūn súcuan te jnūhun jeē cahán rī yāha cūu jeē xīhna gā ni sáha Yaā Dios iīn contrato jiín Abraham, jeē quiiji Cristo jnama ya yohó, te ni sácutú yá. Yūcuán na te ni yāha cuūn ciento ocō uxī cuiyā, te sáá te ni jēhe ya ley nuū Moisés. Te ley un jéé ní quee cueé gá, ma cūu nacanu contrato un, ni ma cūu casí nuū jnúhun jeē ni jéjnūhun ya jeē jnama ya yohó. **18** Chi nūu jeē jiín ley Moisés jnama Yaā Dios ñayuu, yūcuán na te nasūu sīquī contrato jeē ni jéjnūhun ya cūu. Chi sa suhva sīquī maá jéé ni jéjnūhun Yaā Dios nuū Abraham cūu jeē ní jnama ya de.

19 Núu súcuan ¿te ndese jéjníñu ley Moisés? Jéjníñu chi ni jéhe ya un cuéé gá návāha nastúu cuéchí i. Te ni ndacu jniñu máá-ni nde ná tu quiji Cristo, Yaā cíú yucún jeē ni jéjnūhun Yaā Dios jeē quíji. Te nde ná ni jéhe Yaā Dios ley un núu ñayuu, te ni tají yá tācá ndajéhé yā ni cacastūhun núu Moisés, te Moisés ni nacachí nuū i. **20** Te sín cíú jnūhun jeē ni jéjnūhun ya nuū Abraham jeē quíji Cristo, chi máñuhún-ni ya ni jejnūhun, te tu ní jíni ñuhún ni iin jeē nacachí nuū Abraham.

Síquíndese jéjníñu ley jenahán

21 Núu súcuan ¿te á cúní cahān jeē ley jeē ni jéhe Yaā Dios nuū Moisés, téjiyo jeē ni jéjnūhun ya ún? Tú cuití jeē súcuan. Chi núu jeē ni jéhe Yaā Dios iin ley jeē cótecu ñayuu níi cáni sáha, yūcuán na te quendōo ndaā i nuū yā síquí jeē squícu i jniñu ndácu ley un núu. **22** Te tuú chi yósó núu tútu ií jeē ndihí ñayuu ñayíví, nájnūhun yíndihyū i vecāa chi cayíhi i chíji cuéchí. Te súcuan cíú návāha tācá i jeē candíje i jeē ni jíhí Jesucristo jehé i, nihín i máá jeē ni jéjnūhun ya nuū i síquí jeē candíje i ún.

23 Chi nde ná tu quee jnūhun candíje yó Cristo, te nájnūhun ni yíndihyū yō ni sáha ley jenahán, návāha condetu yó quíví quiji Cristo, Yaā candíje yó. **24** Núu súcuan te ley ni cuu iin jeē ndító yóhó nájnūhun iin mozo ndító súchi lúlí, te ni jejníñu nde quíví ní quiji Cristo, návāha candíje yó jéé ni jíhí yā jehé yō, te ndahva Yaā Dios cuéchí yó. **25** Te vijna jeē ní quee Cristo, Yaā candíje yó, te tuá yíhi yó ndaha ley jeē cíú nájnūhun mozo ndító yóhó.

26 Chi ndivii rō cácuu sēhe Yaā Dios síquí jeē ní cacandíje ró Cristo Jesús. **27** Chi tāca ró jeē ní

jendute ró síquī jeē ni quívī ró ndaha Cristo, ni sáha ya jeē ní nduu ró nájnūhun cúu máá yá. ²⁸ Te vijna chí tuá cíu ró ni ñayuu hebreo ni ñayuu griego, ni mozo jeē ní jeen ñayuu, ni ñayuu sájniñu cuenta maá, ni tēe ni ñahan. Chi iin na cíu ró nūū yā jeē cáyīhi ró ndaha Cristo Jesús. ²⁹ Te nūu cáyīhi ró ndaha Cristo, nūu súcuan te yucūn Abraham cácuu ndije ró, te nihīn rō maá táchū jeē ni jéjnūhun ya.

4

¹ Jeē cahán rī jiín ró jijnáhan ró cíu jeē yáha: fin súchi chíi táchū, vēsú maá i naquihin ndihī jeē névāha tátá i, te nūu lulí i chi inuú cíu i jiín mozo. ² Chi yīhi i ndaha tāca jeē ndítō i jiín jeē ndítō ndajníñu i, nde quee quiví jeē ní jeni tátá i, te sáá te nihīn i. ³ Te suni súcuan yóhó, chi nde ná tu jecūhun ni yō síquī Cristo te ni cuu yó nájnūhun súchi lúlí, te ni yīhi yó chíji tācā costumbre jeē ní cajequin ñayuu ñayíví. ⁴ Te nde ná ni quee quiví jeē ní jeni Yaā Dios, te ni tají yá Sēhe ya, ni cacu ya chíji iin ñahan, te ni cacu ya yucūn ñayuu nación hebreo jeē cáyīhi chíji ley Moisés. ⁵ Súcuan ni cacu ya návāha jnama ya yohó jeē tuá quihi yó chíji ley un, te návāha naquihin Yaā Dios yohó cuu yó séhe ya.

⁶ Te síquī jeē cácuu ró séhe ya, te ni tají Yaā Dios Espíritu Sēhe ya ni quiví ini anuá rō, te sáha ya jeē cácahān jee ró: Tátá maá ná. ⁷ Núu súcuan te tuá cácuu ró nájnūhun mozo, chi séhe ya cácuu ró. Te jeē cácuu ró séhe Yaā Dios, te suni nihīn rō maá táchū jeē ni jéjnūhun ya jeē jiín Cristo.

Jeē nácani ni Pablo síquī ñáyuu cáandíje

⁸ Chi nde saá, nde ná tu jecūhun ni rō ndese Yaā cúa Yaā Dios, te ni cacuu ró mozo nuū tāca jeē násūu yáā ndaā cúa. ⁹ Te vijna chi je cájini rō ndese Yaā cúa ya, te vāha ga na cahán rī jeē maá yá je jíní yā rohó. Núu súcuan ¿te najehē cáguli rō nandió cóo ró nduu tucu ró mozo nuū tācā costumbre ñayuu ñayvī jeē tu níhín jníñu cuítí? ¹⁰ Chi máni jeē cánée iī rō quiví jiín yóō jiín vico jiín cuíyā. ¹¹ Te yúhú rí sanaa te tu ní jéjníñu cuítí jeē ní nacani ri jnūhun nuū rō.

¹² Cáhán ndahú rí jiín ró hermano, jeē na cáni ni rō nájnūhun jéni ni maá rí jeē tuá squícu ri costumbre ñayuu hebreo. Chi ruhū ni nasáha ri maá rí nájnūhun máá ró jeē tu ní cayihí ró núu ley costumbre ñayuu hebreo. Te tú na vé ni cásáha ró jeē cucuíhyá ni rī nde saá. ¹³ Chi cájini rō ndese ni cuu ná ni nacani núú rí jnūhun nuū rō ndese jnáma ya yohó. Chi siquí jeē cuuhú rī te ni jecuiñí rī ñuu rō ni nacani ri jnūhun. ¹⁴ Te vēsú jnūndóho ni cuu jeē ní cocuhú rī, te tu ní cásajéē ni rō nuū rī, ni tu ní cásquéhichí ni rō ruhū. Chi sa ni cajetahú ró ruhū nájnūhun jeē cúa ri iin ndajhéhe Yaā Dios, chí nájnūhun jeē cúa ri maá Cristo Jesús. ¹⁵ Núu súcuan ¿te najehē cúa jeē tuá cacusí ni rō jiín rí vijna? Chi náhán rí jeē vāha ni casáha ró jéē ní cajnahuhū ni rō núu jeē cúa te tava rō tinūu vāha máá ró, cuáha ró nduu tinūu rí nuú. ¹⁶ Te vijna ¿á ní nduu ri enemigo rō siquí jeē cachí rí máni jnūhun ndaā nuū rō, chí naún?

¹⁷ Te cáhíyo tēe jeē cándihvī ni siquí rō jijnáhan ró, te nasúu jeē quéndoo vāha ánuá rō, chi sa jeē cáguli de nasásíin de róhó jiín rúhū, návāha condihvī ni rō jeē cúa máá de. ¹⁸ Te íyó vāha jeē cándihvī ni de

jehē rō, te núu jeē quéndōo vāha ánuá rō cíu núú. Chi níní jíni ñúhún sáha de jeē váha róhó, vēsú núu íne ri jiín ró chí núu tú ri íne. ¹⁹ Séhē mánī jijnáhan ró, jeē síquí rohó cíu jeē ínga jínu jnáhuhū ni rī, chi nájnūhun iin ñahan scácu sēhe, súcuan ndóho ri jehē rō. Te suu cíu jeē jnáhuhū ni rī ndétu ri jeē na ndúndaā anuá rō ndacu ró Cristo. ²⁰ Nacā jeē váha núu jeē ndeé ríjiín ró vijna ñúhún, návāha cuu cahān manī rījiín ró. Te tu cíujnúní cuiti ni rī ndese ga cíu jeē cáni ni rī síquí rō.

Jnúhun yátá síquí Agar jiín Sara

²¹ Róhó jíjnáhan ró jéē cúcuni rō quihi ró chíji ley Moisés, cachi nuū rī: ¿A tu ní cájini sōho ró ndese cáhán ley un? ²² Chi cáhán tutu ií jeē Abraham ni íyo uū sēhe yií de. Te iin i cíu sēhe Agar, ñahan cíu mozo vehe de. Te ínga i cíu sēhe ñahan íyó libre, suu ñasihí de Sara jeē ní cuu ña ñahan numá. ²³ Te sēhe ñahan cíu mozo, ni cacu i nájnūhun cácu tāca gá súchi lúlí. Te sēhe ñahan cíu libre, ni cacu i máá síquí jeē súcuan ni jejnūhun Yaā Dios. ²⁴ Te yāha cíu iin jnúhun yátá, chi ndindúú ñahan un cíu ña nájnūhun ndindúú contrato jeē ni sáha Yaā Dios jiín ñáyuu. Máá ñahan nání Agar, cíu ña nájnūhun contrato ley jeē véji nde yucu Sinaí. Te ñayuu cáyihi chíji contrato ley, cácuu i mozo nuū ley un. ²⁵ Chi Agar cíu nájnūhun ley jeē ni jéhe Yaā Dios xinī yucu Sinaí jeē íin nde Arabia. Te cíu ña nájnūhun Jerusalén, ñuu ñayuu hebreo, jeē íyó vijna, chi tāca sēhe ñuu Jerusalén, cícuu i nájnūhun mozo nuū ley un. ²⁶ Te Jerusalén jeē íyó andíví, chi sa suhva íyó libre nájnūhun Sara. Te yóhó ñáyuu cágandíje,

nájnūhun sēhe un cácuu yó, chi íyó libre yō nuū contrato ley. ²⁷ Chi suhva yósó núū tútu iī:

Róhó jeē ní cuu ró ñahan numá jéē tú sēhe ró, na cúsii ni rō.

Róhó jéē tu ní jéhnde chíji ró jéē scácu ró, na cána jee ró jéē cúsii ni rō.

Chi coo cuehē gā sēhe róhó jéē ní cuu ró ñahan numá vēsú ñahan jeē jé ni scácu sēhe.

Achí tutu.

²⁸ Hermano, sēhe Yaā Dios cácuu yó, chi súcuan ni jejnūhun ya nuū yō, nájnūhun ni jejnūhun ya nuū Abraham jeē cacu sēhe de Isaac. ²⁹ Te nde saá te īnga sūchi ní cacu nájnūhun cácu tāca gá ñayuu, ni jito xeēn i Isaac, sūchi ní cacu ni sáha Espíritu. Te nájnūhun ni īyo sáá, suni súcuan cájito xeēn ñayuu tāca séhe Yaā Dios nde vijna. ³⁰ ¿Te ndese cahán tutu iī? Achí: Quenehen ró ñahan cúa mozo na quíhín ña jiín séhe ña. Chi sēhe ñahan cúa mozo, ma nihín i tahū jiín séhe ñahan libre, achí yá jiín Abraham. ³¹ Núu súcuan hermano, tu cúa yó nájnūhun sēhe ñahan cúa mozo, chi nájnūhun sēhe ñahan libre cúa yó.

Na cuñi nīhin yó jiín jnúhun jeē ni sáha libre yohó

5

¹ Te Cristo ni sáha libre yā yohó jéē tuá yīhi yó chíji ley Moisés. Núu súcuan te cuiñi nīhin ró jiín jnúhun jeē ni sáha libre yā yohó, te ma ndívícoo tucu ró cuu ró mozo nuū ley un.

² Sáha ró cuenta jijnáhan ró, chi ruhū Pablo cahán rī jiín ró jeē núu squícu ró ley circuncidar, yūcuán na te tu nihín jníñu cuití jeē ní candíje ró jéē ni jíhī Cristo jehē rō. ³ Te īnga jínu cahán nīhin ri jiín

táca téé cánducú cuu circuncidar, jeē núu súcuan te suni cánuú jeē squícu de ndívii cuítí gā jnūhun cáhán ley Moisés. ⁴ Róhó jeē cánducú rō quendōo ndaā rō jeē squícu rō ley un, je ni casiáá rō Cristo núu súcuan. Je ni castóo rō jnúhun jeē ndahva yā cuéchi rō síquí jeē cundáhú ni Yaā Dios rohó. ⁵ Te máá yó chi cájica yó jíín Espíritu, te cágandíje yó jeē ní ndahva yā cuéchi yó, te jeē yúcuan ñúhun ni yō jeē quendōo ndaā yō quiví cuñí yó núu Yaā Dios. ⁶ Chi yóhó jeē cayihí ndaha Cristo Jesús, vēsú núu jeē cíuu yó circuncidar chí tu cíuu yó, tú na vé níhín jníñu. Jeē níhín jníñu cíuu jeē candíje yó jeē saha ya jehē yō. Te yúcuan saha jeē cundáhú ni yō jnáhan yó.

⁷ Váha ni cacandíje rō núu. ¿Te ndé iin ni jesí jeē tuá cájetáhú rō jnūhun ndaā núu súcuan? ⁸ Jnūhun jeē ní cascáhán de róhó, chi tú vēji nuū maá Yaā ní cana róhó ní quívicoo rō ndaha ya. ⁹ Te ma náā ni rō jeē téé cástahú róhó, jnūhun cástéén de cíuu nájnūhun levadura, chi vēsú jecu-ni levadura, te ndáa ndíhi ñujen saha. ¹⁰ Te cúcáhnu ni rī jeē maá Jítaho yō saha ya jeē ma cándíje rō jíjnáhan rō inga jnūhun jeē sín cahán. Te máá Yaā Dios cuáha ya castigo téé jeē saáca núu xinī rō, núu na-ni téé cíuu de.

¹¹ Te ruhū, hermano, núu jeē nácani ga rī jnūhun ley circuncidar nde vijna, te jnáhan ri ñayuu hebreo ma cóto xeēn i ruhū nuú. Chi ma quítí ni i jeē nácani ri jnūhun jeē ni jíhí Cristo jicā cruz, núu jeē súni nácani ri jnūhun circuncidar nuú. ¹² Te tāca téé jeē saáca núu xinī rō síquí jnúhun ún, váha ga na cáhnde gā de máá de núu súcuan.

13 Chi máá ró jjináhan ró hermano, ni cana ya rohó návāha coo libre rō nuū ley un. Te vēsú iyó libre rō, te ma cáni ni rō jeē cíu quīvicoo ró táca cuéchi jeē cíu modo neé cúní maá ró, chi sa suhva na saha ró máá ró mozo jeē chindéé ñahán ró jnáhan ró siquí jeē cundáhú ni rō i.

14 Chi je ni squícu ró ndihí ley núu squícu ró iin-ni jnūhun ndácu jniñu yáha: Cundáhú ni rō jnáhan ró nájnūhun cündáhú ni rō maá ró, achí. **15** Te núu máni jeē ndónda xeén rō siquí jnáhan ró jeē cuajnáhan ró, te coto ma snáā rō jniñu jeē ni saha ya mēhñu ró jjináhan ró.

Modo cuní ñayuu tu cándíje jíín modo sáha Espíritu

16 Súcuan cáhán rī jiín ró jjináhan ró: Caca ró nájnūhun cúní maá Espíritu, te yūcuán na te ma saha ga rō modo jeē cuní maá ró. **17** Chi tāca jéé cuní maá yó, yūcuan jési nuū jeē cuní maá Espíritu. Te jeē cuní Espíritu, jési nuū modo neé jéé cuní maá yó. Te jeē ndindúú yáha chi cájesi nuū jnáhan, te jeē yūcuan tu cíu saha ró jniñu váha jeē cuní rō saha ró. **18** Te núu máá Espíritu steén nuū rō, núu súcuan te tuá cayihí ró chíji ley jenahán.

19 Te iyó ndijin tāca jniñu cásáha ñayuu cájica jíín modo neé máá, te yāha cíu: Cásiquí ndéé jnáhan i, cásáha i jniñu jnémén, cásáha néé ndasí i. **20** Cáchiñúhún i ídolo, cásáha tásí i, cájito uhū jnáhan i, cájejnáhan i, cácucuñí ni i. Te yachí cáquití ni i, te cándíhví ni i jeē cíu máá-ni i, te cátejnáhan i cásásíin i máá i. **21** Te cácucuésún ni i, cájehni i ndiyi, cánajíni i, cásáha i vico néé, jíín táca gá jeē súcuan. Te cáhán níhin ri jiín ró, nájnūhun je ni cahán rī jiín ró saá,

jeē ñayuu casáha súcuan, ma nihín tahú i quīvicoo i ñuu nuū ndácu Yaā Dios jniñu.

²² Te ñayuu jeē nduú i jíin Espíritu, tācá jniñu yáha sáha ya jiín i: Jeē cundáhú ni jnáhan, jeē cúsíñ ni, jeē iyó ndeyí síñ ni, jeē iyó paciencia, jeē maní ni, jeē váha ni, jeē squícu vāha, ²³ jeē tu sáha jeē cujéhnu, jíin jéē jési modo jeē cuní maá. Te tú na ley cacán cuéchi siquí rō núu sáha ró táca jniñu yáha. ²⁴ Te ñayuu cáyíhi ndaha Cristo, nájnúhun je ni cajehni i modo neé máá i jicā cruz, nde jiín táca jéē ndíyo néé ni i te cútíndí i. ²⁵ Te jeē súcuan ni jéhe máá Espíritu iin vida jeé núu yō, te suni na cáca yó jíin modo steén Espíritu.

²⁶ Te ma sandúxí yó jéē squítí ni yō jnáhan yó, te ni ma cucuésún ni yō siquí jnáhan yó.

Jnūhun jeē chindéé ñáhán yó jnáhan yó

6

¹ Hermano, núu iin jnáhan ró ni sáha cuéchi, te róhó jéē cágica jíin Espíritu, na náchuhun ichí ró i. Te jíin jnúhun vītā cahān rō jíin i, te suni condito ró máá ró jeē ma cacán ini rō sáha ró táca cuéchi.
² Te chindéé ñáhán ró jnáhan ró núu na vé cíu jeē ndóho i, chi súcuan cíu jeē squícu ró ley Cristo.

³ Chi núu iin ñayuu jéni ni i jeē ñayuu teyí cíu i, vēsú nasūu súcuan cíu, te stáhú i máá i núu súcuan.
⁴ Te tācá iin iin ró na cóto ndee rō ndese cáa jniñu sáha ró. Te núu vāha sáha ró, yūcuán na te cuu cusíñ ni rō jíin jéē sáha máá ró, te tu níní jéē scáni jnáhan ró máá ró jíin jnáhan ró. ⁵ Chi tācá iin iin yó cánúú squícu yó jíin jniñu ní jéhe ya nuū maá yó.

6 Te róhó jéē cascuaáha jnūhun vāha ya, na chíndéé ñahán ró tēe cástéén nuū rō jiín táca jéē váha cánевāha ró.

7 Ma stívi ró cani ni rō jeē cuu sáha ró cuéchi. Chi ma cíu sácatā rō nuū Yaā Dios cani ni rō jeē tu sáha ya cuenta. Chi tāca núu ndese sáha ñayuu, suu yūcuán nanihīn i. **8** Chi ñayuu jeē sáha i jeē cuní modo neé máá i, nihīn i jeē jnahnu ndetū i sáha modo jeē cuní maá i ún. Te ñayuu jeē sáha jeē cuní maá Espíritu, chi nihīn i jeē cótecu i níi cáni andíví sáha Espíritu. **9** Te ma cuíta yó jeē sáha yó jniñu váha núu súcuan, chi jeē quée maá quívī te nanihīn yō, te núu ma cuíta yó. **10** Núu súcuan te tāca jínu jeē cíu sáha yó, te na sáha vāha yó jiín táca ñayuu, te hermano yō jeē cágandíje cíu jeē cánuú gá.

Saludo jiín jnúhun cástuhun Pablo jeē sándihí

11 Condéhe ró jeē náhnu letra téé ri cuajeé nuū rō jijnáhan ró, chi ndaha máá rí téé ri yāhá. **12** Te téé jeē casáfuerza de róhó cuu ró circuncidar, cásáha de siquí jeē cágundi de cuajnúhún ñayuu de. Te cásáha de návāha ma cóto xeén ñayuu de jeē cánacani de jnūhun jeē ni jíhī Cristo jehé yō. **13** Te ni máá de jeē casáha de circuncidar, suni tu squícu vāha de ndihī ga ley jenahán. Te cágundi de jeē cuu ró circuncidar, návāha cuu sátényí de máá de núu quihin ró jnúnī circuncidar sáha de. **14** Te ruhū tu cúní rī satényí rí maá rí siquí ní iin jeē yúcuan, chi máá iin-ni siquí jeē ni jíhī Jitoho yō Jesucristo jicā cruz. Chi siquí yúcuan cíu nájnúhun ni jíhī rī, chi ni siaá rī tāca jéē iyó ini ñayíví, te suni nájnúhun iin ndiyí cíu ri nuū ñayíví. **15** Chi núu yíhī yó ndaha Cristo Jesus, te tu níhín jnínú núu cíu yó

circuncidar chí tuú. Chi jeē níhín jníñu cúu jeē ní nasájeé yá anuá yō. ¹⁶ Te ñúhun ni rī jeē tāca ró jeē jíca ró jíín modo yáha, na sáha ga yā jeē coo ndeyí coo sīñ ni rō, te cundáhú ni yā rohó. Te suni ñúhun ni rī jeē súcuan sáha ya jíín táca gá i jeē cúu ndije i ñayuu cácadíje Yaā Dios.

¹⁷ Te vijna jíín níñ gá cuahān yō, cúní rī jeē ma stáhān gā ni iin ñayuu ruhū. Chi yíqui cùñu rī ndíso seña jeē ni tújí rī ni ndoho ri jeē cúu ri mozo maá Jítaho yō Jesús.

¹⁸ Hermano, ñúhun ni rī jeē na sáha ga Jitaho yō Jesucristo jeē váha róhó jíjnáhan ró. Súcuan na cóo. Amén.

**Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)**

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

xx

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
9665e546-39d0-5bd5-8b10-38916a94951f